

# USIM 'sihatkan rakyat' di Karnival Pagoh

**SEREMBAN 24 Feb.** - Universiti Sains Islam Malaysia (USIM) membawa agenda kesihatan kepada penduduk dalam Program Karnival Kesihatan dan Ekonomi Parlimen Pagoh 2015, di Dewan Sekolah Kebangsaan Sri Bukit Pasir, Johor baru-baru ini.

Naib Canselor USIM, Prof. Datuk Musa Ahmad berkata, karnival itu adalah telah memberi kesedaran kepada masyarakat setempat tentang kepentingan penjagaan kesihatan tubuh badan.

"Dalam masa sama, kita mengeratkan silaturahim antara USIM dan penduduk setempat serta memperkenalkan USIM sebagai satu institusi pendidikan yang memperjuang kesyumuluan Islam melalui pendekatan integrasi ilmu naqli dan aqli," katanya di Nilai, dekat sini hari ini.

Tambahnya, selain itu, karnival yang berlangsung itu telah mencapai objektif penyelidikan *Consultation on Strategic Planning Of Community Development Through Social Auditing In The Pagoh Constituency* yang merupakan naungan Timbalan Perdana Menteri, Tan Sri Muhyiddin Yassin.

"Melaluinya, USIM dilantik sebagai ahli perundingan dalam



**MUSA AHMAD** bertanyakan sesuatu kepada kanak-kanak yang menunggu giliran untuk mendapatkan pemeriksaan kesihatan dalam Karnival Kesihatan dan Ekonomi Parlimen Pagoh 2015 di Dewan Sekolah Kebangsaan Sri Bukit Pasir, Johor, baru-baru ini.

menjalankan kajian selama tempoh dua tahun (Ogos 2014-Julai 2016) di mana Timbalan Perdana Menteri turut memperuntukkan sejumlah dana untuk pembangunan masyarakat setempat di kawasan Pagoh yang juga merupakan kawasan Parlimen beliau," katanya.

Menurutnya, penganjuran karnival itu juga amat bersesuaian

dengan bidang USIM dalam pengajian Islam serta Sains dan misi dalam menjadi sebuah institusi ilmu yang terkehadapan berteraskan integrasi ilmu naqli dan aqli bagi menyelesaikan isu-isu masyarakat dan Islam.

"Pada karnival ini, USIM mengumpulkan data kedudukan ekonomi keluarga di samping melihat po-

tensi perkembangan taraf ekonomi sesuatu keluarga di kawasan Parlimen Pagoh," ujarnya.

Jelasnya, penyelidikan itu menekankan enam elemen merangkumi aspek agama, ekonomi, sosial, politik, persekitaran, kesihatan dan pendidikan.

"Penyelidikan yang telah bermula sejak September 2014 kini berada dalam fasa mengumpul data menggunakan metodologi persampelan kepada pelbagai lapisan masyarakat di sekitar Dewan Undangan Negeri (DUN) Jorak termasuklah melalui kaedah soal selidik berkelompok dan temubual," katanya.

Program yang berlangsung itu meliputi aktiviti gotong-royong di Kampung Permatang Pasir, Kampung Parit Sharif dan Kampung Sungai Raya selain ceramah berkaitan mencegah nyamuk aedes dan demam denggi serta bahaya kencing tikus yang disampaikan oleh pensyarah Fakulti Perubatan dan Sains Kesihatan (FPSK) USIM, Dr. Rahman Omar.

Aktiviti lain yang telah diadakan di situ adalah lawatan dari rumah ke rumah bersama jururawat KPJ Bandar Maharani, pelajar FPSK USIM dan juga doktor perubatan USIM.